

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : DATO' HAJI ZAINUDIN BIN ISMAIL  
[ JELEBU ]**

**TARIKH : 25 MEI 2016**

**SOALAN :**

**Dato' Haji Zainudin bin Ismail [ Jelebu ] minta MENTERI PERUSAHAAN PERLADANGAN DAN KOMODITI menyatakan :-**

- (a) Berapa ramai penoreh dan pekebun kecil getah telah mendapat manfaat menerusi Skim IPG yang dilaksanakan. Huraikan berapa jumlah insentif yang telah dibayar sehingga kini, secara purata berapakah jumlah insentif yang diterima mereka bagi penghasilan sehektar mengikut harga semasa; dan
- (b) Apakah usaha-usaha Kementerian untuk memberikan nilai tambah ke atas hasil-hasil getah pekebun-pekebun kecil agar mereka mendapat pulangan dan harga yang lebih baik berbanding dengan sekadar mengeluarkan *cuplumps*.

**JAWAPAN :**

Tuan Yang Di-Pertua,

- (a) Untuk makluman Ahli Yang Berhormat, Insentif Pengeluaran Getah (IPG) merupakan inisiatif Kerajaan bagi memastikan para pekebun kecil getah menikmati pendapatan minima dalam keadaan penurunan harga getah. Selain itu, ianya bertujuan menggalakkan para pekebun kecil getah meneruskan aktiviti-aktiviti penorehan dan memastikan bekalan bahan mentah kepada industri hiliran getah tidak terjejas.

IPG telah dilaksanakan mulai 1 Januari 2015. Pada Januari 2016, Paras Harga Pengaktifan (PHP) IPG bagi SMR20 telah dinaikkan dari RM5.10 sekilogram kepada RM5.50 sekilogram dan bagi *cuplump* dari RM2.00 kepada RM2.20 sekilogram.

Sejak IPG diaktifkan pada bulan Oktober 2015 dan sehingga 30 April 2016, seramai 107,930 pekebun kecil dan penoreh telah menerima manfaat dari pelaksanaan ini dengan jumlah bayaran sebanyak RM16.5 juta.

Pekebun kecil getah dengan pemilikan purata 2 hektar dan produktiviti *cuplump* sebanyak 3,000 kilogram sehektar setahun akan menikmati pendapatan bulanan sebanyak RM1,100. Ini bererti pendapatan purata bulanan sehektar adalah RM550.

Tuan Yang Di-Pertua,

(b) Selain pelaksanaan IPG, usaha-usaha Kerajaan untuk meningkatkan pulangan pendapatan kepada pekebun kecil getah termasuk:

- i. Peruntukan sebanyak RM10 juta bagi menggalakkan para pekebun kecil meningkatkan pengeluaran lateks. Peruntukan ini akan digunakan untuk tujuan memperkukuhkan infrastruktur kutipan lateks di mana ianya akan dilaksanakan di beberapa tempat seperti Palong, Negeri Sembilan, Lipis, Pahang dan Grik, Perak. Langkah ini di samping mengurangkan pengimportan lateks juga akan menyumbang kepada peningkatan pendapatan pekebun kecil memandangkan harga lateks adalah lebih tinggi berbanding harga *cuplump*;
- ii. Melaksanakan Mekanisme Penetapan Harga di Ladang dengan menyediakan peruntukan sebanyak RM6.4 juta kepada koperasi sebagai modal pusingan untuk menjalankan aktiviti urusan getah. Berdasarkan maklum balas, sehingga kini sebanyak 18 koperasi sedang terlibat dalam urusan getah dan menawarkan pada puratanya RM0.10 sehingga RM0.20 sekilogram lebih tinggi berbanding pembeli getah berlesen;

- iii. Menggalakkan peningkatan penggunaan getah dalam negara termasuk menggunakan adunan getah dengan bitumen dalam pembinaan jalan raya. Hasil penyelidikan menunjukkan penggunaan adunan bitumen dengan getah, walaupun meningkatkan kos pembinaan sehingga 15%, dapat menjimatkan kos penyenggaraan dengan anggaran sebanyak RM25,000 bagi setiap kilometer setahun. Ini disebabkan oleh daya ketahanan jalan yang lebih tinggi; dan
- iv. Memperkukuhkan aktiviti-aktiviti penyelidikan ke arah menghasilkan produk-produk baru dan nilai tambah berasaskan getah. Langkah ini akan membolehkan peningkatan penggunaan getah asli dalam negara termasuk dalam pengeluaran produk-produk baru berasaskan getah untuk pasaran eksport.

Sekian, terima kasih.